

Xlimactiy Xcarta San Pablo Huantu Tzóknih Timoteo

Umá xlimactiy carta huantu San Pablo tzóknih Timoteo ąhuayu luu xtachuná huantu luu pulh titzóknih, porque nac umá carta limakalhchu-huinicán Timoteo pi huantu akstítum catláhuahl xtascújut Cristo y calipáhua y catayánilh nac xlatámat cumu “lá chatum sculuja xtropa Jesucristo” (2.3). Xahuachí huanicán pi lata akstítum nalipahuán Cristo y nalichuhuinán xtachuhuín lhuhua huantu amácalh limaqspulicán, hasta naliputzastalacán, natamacnucán nac pulachin o nachihuilicán, y lhuhua huantu nalimapatinicán caj xpápacata cumu liscujma Cristo. Pero lacatancs huanicán Timoteo, para xlícaná lacxtum taniyáhu Cristo mima quilhtamacú acxní lacxtum natamapeksinanáhu nac xpumapeksín.

Xahuachí limakalhchuhuinicán Timoteo pi xlíankalhjiná quilhtamacú calíkalhtahuákalh amá xtachuhuín Dios huantu makán tatzoktahuilanit nac líkalhtahuaka (3.15-16).

Nac umá xcarta San Pablo lichuhuinicán lata lácu aya makásá patinanit nac pülachin y lacpuhuán pi aya talacatzuhuima quilhtamacú acxní namanicán. Limaqatzankey Timoteo pi na juerzaj catlahuánilh laqui natayaniy nac xlatámat y camakantaxtikolh huantu Dios lìlacsacnít cumu la xlá xmakantaxtinit nac xlatámat.

¹ Aquit Pablo xapóstol Jesucristo, porque Dios quilacsacnít pi nacliakchuhuinán ąmá lípaxúhu latámät huantü xlá malacnuý nacamaxquiy latachá tıcu nalipahuán Cristo Jesús. ² Luu caña lipaxúhu ctzoknimán eé carta huix Timoteo huantí climaxtuyán quinkahuasa porque cpaxquiyán, aquit clacasquín pi Quintlaćicán Dios xahua Quimpuchinacán Jesucristo catasiculanatlahuán y catamaxquín huantü tlän latámät.

Tancs xlimalulókot Timoteo pi lipahuán Cristo

³ Timoteo, xchaliyán lacatzisa y catzisní acxní ckalhtahuakaniy ąmá Quintlaćicán Dios huantí akstítum clacscujnima chuná cumu xtalipahuán y xtascujnimánah xalakmakán quilitalakapasni, aquit clacapastacán y cpaxcatcatziniy Dios caj xpàlacata huantü tlahuama nac milatámät. ⁴ Acxní aquit clacapastaca laṭa huix tasa acxní tapajpitzihu, hasta caj uceu xacucxilhni clacpuhuán laquí chuná xackalhipá tapaxuhuán caj mimpalacata, ⁵ porque aquit stalanca ccatziy lácu akstítum lipahuana Cristo, mäsqui xlícana pi pulh huá lipahuanit tamá minaña huanicán Loida xahua mintzí Eunice. Pero na lacatancs cmáluloka pi huix nachuná akstítum lipahuana. ⁶ Huá xpàlacata climaxtanzankeyán pi camauxcani tamá xlitlihueke Dios huantü huix maklhtínanti ąmá quilhtamacú acxní aquit ckalhtahuakánih Dios mimpalacata y cliacchipán quimacán. ⁷ Porque Dios ni quincamaxquinítán xlitlihueke Espíritu Santo laquí caj chapecuaj nalatamayáhu, huata huá quincalimaxquinítán

laquí nakalhiyáhu litlihueke, tlən talacapastaci
y laquí nacapaxquiyáhu latachá tícu ya cristiano.
 8 Necxnicú tilimaxanana lata tancs maluloka
pi lipahuana Quimpuchinacán Jesús; na nipara
aquit necxnicú quintilimaxanana pi ctanuma nac
pulachin caj xpälacata cumu na clipahuán Cristo.
 Huata huix catatayani tamá litlihueke huantu
 Dios maxquiyán, masqui lhuhua huantu lipatiya
 nac milatámat caj xpälacata mintacanájlat y cumu
 lichuhuinámpat tamá lipaxúhu xtachuhuín Cristo
 huantu mastay laktáxtut. 9 Dios quincalacsacnítán
 laqui namacamaxquiyáhu quilatamatcán
 porque huá quincalakmáxtún, pero ni huá
 quincalilakalhamán cumu para túcuya tlən
 tascújut makantaxtihu sinoque chuná tuncán
 xlaclhcahuilinit pi naquincalakmáxtuyán cumu
 snun quincapaxquiyán y antá stalanca masiyulh
 nac xlatámat Cristo Jesús. Hasta lata Dios nia
 xmalacatzuquiy caquiltamacú xlá chunatiyá
 xquincalacsacnítán y xquincapaxquimaná,
 10 pero acxní chu macámilh Quimakaputaxti-
 nacán Jesucristo nac caquiltamacú luu lacatancs
 malúlokli pi xlícana quincalakalhamanán,
 porque xlá makatlájalh xlíhuak xlitlihueke
 xpuchina calinín y caj xpälacata umá xasasti
 xtamácatzinín huantu mastay laktáxtut antá
 stalanca quincamácatzinimán lácu nakalhiyáhu
 amá lipaxúhu latámat huantu necxnicú laksputa
 para nalipahuánáhu.

11 Dios quililácsacli laquí nacliakchuhuinán
 eé xasasti xtamácatzinín, y quilimáxtulh
 xapóstol Jesucristo huanti lihuanaq nacalima-
 kalchuhuiniy cristianos. 12 Pus huá xpälacata

aquit clitayanimá masqui lhuhua huántu cpátima uú nac pulachin; huampí nipara tzinú clímaxanán porque stalanca ccatziy tícu cmacamáxquinit quilatámat, xahuachí ccatziy pi Dios kalhiy litlihueke laqui naquimaktakalha nitu naquiakspulay hasta nalakchán quilhtamacú acxní nacmákantaxtikoy umá xtascújut huántu quimáquentajlinit. ¹³ Huix akstítum calilatapa tamá xatlán talacapastacni huántu aquit cmásiyuninitán, xahua mintacanájlat y amá tapaxquit huántu aquinín kalhiyáhu cumu huá tatalacastucnítáhu Cristo Jesús. ¹⁴ Camaxqui quilhtamacú tamá Espíritu Santo huánti lama nac quilatamatcán pi namaktayayán laqui lihuana namakantaxtiya mintascújut huántu Dios lilacsacnítán naliakchuhuínana.

¹⁵ Cumu lá huix stalanca catziya pi xlihuák amákolh natalán huánti uú xtahuilánalh huánti xalac xapulatamán Asia quintaakxtekmakan-kolh, nachuná quintatláhualh quintalacán Figelo xahua Hermógenes; xlícaná pi lan quintamakalipúhua acxní chuná quintatláhualh.

¹⁶ Aquit clacasquín pi Quimpuchinacán cacásiculanatláhualh y cacamaktáyalh Onesíforo chu xlitalakapasni, porque xlá maklhuhua quimáuxcánih y quimáakpuwantiyánih acxní aquit xacípuhuama, y ni quilimaxánalh masqui aquit xactanuma nac pulachin. ¹⁷ Na acxni milh uú nac xacächiquín Roma quilacapútzalh hasta quimáñóklhulh. ¹⁸ Pus huá Quimpuchinacán calakalhámalh y camáxquilh xlaktáxtut acxní nalakchán amá quilhtamacú namimparay xlimaktiy, porque huix stalanca catziya lata lácu

xlá quimaktáyah acxní xlamanancháhu nac xacächiquín Efeso.

2

Huanicán Timoteo pi cascujli cumu la chatum sculujuua xtropa Jesucristo

¹ Pero huix quinkahuasa Timoteo, huá catatayani tamá xlitlihueke Cristo laqui chuná tancs namakantaxtiya mintascújut. ² Huantu huix kaxpatnita pi ccalimakalhchuhuiñinít lhuhua cristianos lata lácu líhuana natalipahuán Cristo, pus náchuná huix cacalimakalhchuhuiñi amákolh huánti luu laktlihuekén talitasiuyu xtacanajlatcán, laqui chuná xlacán ná natalimakalhchuhuiñiy xamakapitzín cristianos.

³ Huix huák tlán catlahua y paxuhuña capati huantu akspulayán cumu la chatum sculujuua xtropa Jesucristo. ⁴ Acxní chatum tropa mákantaxtima xlitascújut huantu lakayahuacanit, nitu tiliscujparakey atúnuj tascújut huata caj xmanhuá liscuja huantu limapeksicanit laqui chuná namakapaxuhuay xpuxcu. ⁵ Náchunalitum acxní chatum kamána huanti latlajama para xatícu atzinú tlak tlán kamánan, xlicána pi ni catimaxquícalh xtrofeo para níchuná namakantaxtiy lata lácu xlíkamánat xuanit. ⁶ Pus náchuná camakantaxti mintascújut cumu la amá cristiano huánti scujma y chananama nac xcátuahuán, tancs tlahuay xtascújut porque catziy pi puh huá lakchán nalihuayán huantu antá namakalay. ⁷ Xlihuák umá huantu aquit cuanimán, huix líhuana

calacapástacti lácu ątzinú nalimacuaniyán nac milatámat, xahuachí Dios namaktayayán laquí naakataksa xlíhuak huantü huix catziputuna.

⁸ Xahuachí necxnicú tipatzankaya nalichuhui-nana Jesucristo, pus huá uemá tachuhuín huantü aquit ccalimakalhchuhuiniy cristianos pi Cristo huá xlitalakapasni xuanit xamakán kolutzín rey David, pero cumu Xkahuasa Dios huá lilacasta-cuánalh nac calinín, y para xlacán ná natalipahuán pus ná nacalakmaxtuniy xlistacnicán. ⁹ Xlicana pi caj xpälacata uemá xasasti xtamacatzinín lhuhua tapatín huantü aquit clipatima y hasta caj huá xpälacata mäsqui quilimacachicanit ca-dena cumu la chatum makníná; pero mäsqui aquit quinchicanit amá lipaxúhu xtamacatzinín Dios nitü chimácalh. ¹⁰ Huá xpälacata aquit clitayanimá mäsqui lhuhua huantü cpatima nac quilitámat laqui chuná naccalimaktayay amakolh huantü Dios calacsacnít y xlacán ná natakalhiy laktáxtut chu amá lipaxúhu latámat huantü necxnicú laksputa para natalipahuán Quimpuchinacán Cristo Jesús.

¹¹ Luu xtalulóktat amá takalhchuhuín huantü chiné huan:

Para aquinín tancs catziyáhu pi aya taninitáhu Cristo,

pus ná quilicána jlatcán pi acxtum natálatamaya-cháhu nac akapún.

¹² Para lanchú lhuhua huantü patimanáhu caj xpälacata,

ná tancs cacatzíhu pi lacxtum natámapeksina-náhu.

Pero para aquinín ni litayayáhu nac xlacatincán cristianos pi lakapasáhu, pus na nipara huá catilitáyalh para quincalakapasán.

¹³ M̄asqui acatunu aquinín ni luu xlicana akstítum lipahuanáhu, pero xlá chunatiyá quincalakalhamanán.

Porque nilay caj naaksaninán y ni namakantaxti-putún huant̄u aya quincalitayaninítán.

Pablo huaniy Timoteo pi tancs camakantáxtih amá tascújut huant̄u Dios lilacsacnít

¹⁴ Huix lihuaná cacamalacapastacni cristianos y cacalimapeksi nac xlacatín Dios pi niaj cataliaklhuhuátnalh amá tachuhuín huant̄u nitu limacuán, porque xlicana pi taaklhúhuit nitu limacuán, huata caj talilaclatayay xlihuak huant̄i cakalhakaxmata. ¹⁵ Huix juerza catlahuani lihuaná namakantaxtiya mintascújut huant̄u Dios lilacsacnítán laquí chuná nalitaxtuya chatum tlán xtasacua huant̄i akstítum lama y nitu catilimamaxanícantí porque tancs masiyúpat amá xatalulóktat xtachuhuín Dios huant̄u mastay laktáxtut. ¹⁶ Necxnicú tilichuhuinana tamá talacapastacni huant̄u uú xala caquilhtamacú porque nitu limacuán xahuachí caj huak xtalacapastacnicán cristianos, y xlihuak huant̄i chuná talikalhchuhuinán lihuaca talilaktzankatayay nac talakalhín. ¹⁷ Y amá lixcájnit tachuhuín huant̄u tamasiyyuy laлиhuán talakapuntumi y xtachuná cumu la surumpiyu tajátat, huatiyá umá huant̄u talilaktzankatayanit Himeneo xahua Fileto.

18 Cumu niaj chuná tacanajlay xtalulóktat Dios xlacán tahuán pi acxni naniyáhu niaj catilacastacuanáhu nac calinín porque la quililacastacuanatcán xuanit aya kantaxtunít nac quilatamatcán, chuná taliakchuhuinampulay y lhuhua cristianos akatiyuj catlahuanima xtacanajlatcán. **19** Pero aquinín stalanca catziyáhu pi Dios lihuana caxuilinixtalacapastacni huantú nipara chatum tícu catilacxtláhualh y antá chiné tatzoktahuiilanit: “Mimpuchinacán huak calakapasa huantí tatapeksiniy”, y lacatum chiné huamparay: “Y xlihuak huantí talipahuán Quimpuchinacán Cristo catalakmákalh xlihuak huantú lixcájnit talakalhín.”

20 Cumu la huixinín catziyátit pi antanícu tlana huilácalh nac aktum lanca chiqui lhuhua jalán kalhicán, makapitzín pulatu xla oro, vasos xla plata, y na kalhicán makapitzín xla páklhat chu xla lilhtámat tíyat amákolh huantú xla oro o plata caj xmán capuhuayancán acxni tlahuacán lanca paxcua o caj licácnit likalhicán, y makapitzín jalán huantú xla quihi chu xla lilhtámat caj chunatá limaclacasquincán. **21** Pus xlihuak amákolh cristianos huantí talakmakán huantú lixcájnit talakalhín nac xlatamatcán talitaxtuy cumu la vaso chu pulatu xla plata y xla oro huantú calilakachixcu-huicán Dios. Para tícu luu akstítum nalatamay Dios namä cuentajliy xtascújut.

22 Huix catzalamákanti xlihuak huantú ni camininiy tatlahuay lakkahuasán y nichuná cacama-ståla, huata caj xmánhuá akstítum calilatapa mintacanájlat lata lipahuana Dios, lata capaxquiya mintacristianos, y akstítum calatapa nac xlak-

stipancán huantí xlihuak xlitlihueke xnacujcán taquilchániy Quimpuchinacán. ²³ Huix calakmákanti xlihuak huantu caj xtalacapastacnicán cristianos huantí caj talimqaklhuhuinamputún masqui tahuán pi huá xaxlicana tlán talacapastacní, porque huix aya catziya pi nítu limacuán huata caj antá talimatzuquiy tasitzi. ²⁴ Porque chatum cristiano huantí aya macamaxquinít xlatámat Quimpuchinacán nipara tzinú mininiy caj xman natatlancanitákchokoy, huata xlá mininiy pi latachá tícu ya cristianos tlán cacacatzínih, cakálhíl ihkalala laqui nacamakalchchuhuiyi cristianos, y masqui túcu nitlán natlahuanicán xlá ni pála xlisítzit o xliaklhuhuátnat. ²⁵ Y para tícu catziy pi tlahuama huantu nitlán talakalhín, xlá mininiy pi lacatitum camakalchchuhuiñilh, chicá para xamaktum Dios nalakalhamán y chuná natlakapasa huantu xlá kalhiy xtalulóktat, ²⁶ y chuná natatzalaniy akskahuiní huantí xtachín calilama y camatlahuijma huantu xlá lacasquín natatalhuay.

3

Lácu natalay cristianos acxní talacatzuhuimajá nahuán quilhtamacú lata namimparay Cristo

¹ Timoteo, huix luu milicázit pi acxní aya talacatzuhuimaj nahuán quilhtamacú lata namimparay Cristo luu catuhuá huilanáhu nahuán. ² Lhuhua cristianos huantí caj xman sacstucán nacaaklihuancán, xman huá luu natalakañilacán natakalhiy lhuhua tumín; luu lactalipahú nacamaklhcatzicán y

natalacataquinán, xahuachí catuhua huántu xala uumá caquiltamacú caj laksputa y niitu limacuán xlacán huak natalakatiy. Hasta calahuá natalikalhkamánán xtachuhuín Dios y niaj catitakalhakáxmatli huántu nacalimapeksiy xtlatcán huata natakalhakaxmatmakán, mäsqui Dios xcalakalhamanit camälacnuninit nacalakmáxtuy, xlacán caj natalakmákán y nipara tzinú catitacacnínánih xlihuak huánti talipahuán Dios.

³ Xlacán nipara chatum tícu catitalakalhámali, y para tícu nacatlahuaniy huántu niatlán ni catitamatzankenánih, xahuachí xlacán lanca xaaksinaninán natahuán, luu lanca calakayácalh nahuán y luu tlakaj natalilay xmacnicán y lhuhua huántu lixcájnit natalitlahuay, luu laclixcájnit natalicatziy y ni catitaucxilhputúlh huántu tlän tascújut. ⁴ Hasta sacstucán natzucuy laliaksihuinín nalalitalakaspittayay y nipara tzinú catitalacamáxánali, tlancaj nacamaklhcatzicán cumu la ti niitu catzankaniy, xahuachí caj luu xmánuá natalaktzaksay lácu natamakapaxuhuay xmacnicán ni xachuná catitalacpútzalh lácu líhuana natalipahuán Dios. ⁵ Tamakolh cristianos calakuán natamasiyuputún pi luu talipahuán Dios mäsqui stalanca natalitasiyuy xlihuak huántu lixcájnit tatlahuay pi nipara tzinú tamacamáxqui putún xlatamatcán Dios.

Xlihuak tamakolh cristianos huánti chuná talamánalh huix ni amigoj cacatala. ⁶ Huatunín tamakolh lacchixcuhuín huánti makapitzín tali-taxtuy pi luu talipahuán Dios y taliakchuhuinán xtachuhuín, y hasta taán talakapaxialhnán nac

xchiccán amakolh lakahuitinín lacchaján huánti tatinlahuanit lhuhua talakalhín nac xlatamatcán, y mäsqui talílipúhuán caj xpápacata huántu líxcájnit tatinlahuanit niaj lay talakmakán huántu tatalhuay. ⁷ Umakólh lacchaján ankalhíná talacputzamáñalh líhuana natacatziy lácu luu akstítum natalatamay, pero niaj lay taakataksa xtalulóktat Dios. ⁸ Pero naccáhuaniyán lata xamakán quilhtamacú xtahuilánalh chatuy scuhuananín huánti xcáhuanicán Janes y Jambres, xlacán ankalhíná xtahuán pi nítlan huántu xmásiyuma Moisés y xtamálakspputuputún mäsqui huá amá limapeksín xtalulóktat, pus náchuná chú tamakolh lacchixcuahuín ni talacasquín nalakapascán xtalulóktat Dios, porque xlacán aya cámálaqtzankeyahuanit xalíxcájnit xtalacapastacnicán y niaj talipáhuán Dios. ⁹ Pero ni luu makás quilhtamacú catitatapálhílh porque xlihuák cristianos natacatziy pi caj taksaninamáñalh y nitu xtacatzincán, náchuná nacqakspulay cumu la cäakspúlah amakolh chatiy scuhuananín acxni ni tamatlántílh huántu xlichuhuinama kolutzín Moisés.

Akstítum calílatámálh Timoteo huántu másiyunicanit

¹⁰ Pero luu cäna clipaxuhuay pi akstítum lilápat huántu aquit climákalhchuhuininitán chuná cumu la aquit akstítum clílama huántu luu ccänajlay, xáhua lácu ccápaxquiy cristianos, chuná cumu la quílicamama huántu aquit clítatlihueklha mäsqui ankalhíná. ¹¹ Quimputzastalamácalh y lhuhua huántu quílimapatiinicán cumu la huix stálanca catziya

lácu quimapatinícalh nac xacächiquín Antioquía, Iconio y Listra, antá lan quintalikamánalh y hasta quintaputlakállelh, pero acxni chuná xquintlahuamácalh Quimpuchinacán quimaktáyalh y niitu quiakspúlalh. ¹² Aquit tancs cuaniyán pi xlihuák amäkólh cristianos huánti luu akatziyanca y akstítum talatamaputún porque tamacamáxquinít xlatamatcán Cristo Jesús, xlicana pi lhuhua huantü nacalimapatiníicán y nacaputzastalacán. ¹³ Pero lata ámaj nahuán quilhtamacú xlihuák amäkólh laclixcájnít lacchixcuhuín átzinuj tatlahualenít nahuán porque chuná cumu la xlacán taakskahuiminamánalh nahuán nachuná sacstucán tataákskahuitamamánalh y natalaktzankatayay.

¹⁴ Timoteo, pero huantü huix milacata akstítum calíscuji huantü aya catziya pi milimäkantáxit, y huantü lipahuana pi chuná lakchán, porque stalanca catziya tícu chuná talimäkalhchuhuini-nítán. ¹⁵ Xahuachí calacapástacti pi hasta acxni actzü kahuasa xuanítacú tzucuníta màsiyunicana lácu huan Dios nac xlikalhtahuaka, antá huí lacuán tastacyáhu huantü xtalacapástacni Dios y huá tlän nalilakmäxtuya milistacni para akstítum lipahuana. ¹⁶ Porque xlihuák huantü tatzoktahülanít nac likalhtahuaka huá xtalacapástacni Dios, huá cämälacpuhuánilh cristianos pi catatzokuílh y huák aquinín quincalimacuaniyán laqui nacatziyáhu lácu tancs namasiyuyáhu xtalacapás-tacni Dios y lácu namatancsayáhu xtalacapástacni chatum huánti taakskahuinit y ni akstítum lipahuán Dios, y laqui ná nacatziyáhu nacahuaniyáhu

lácu xlilatamatcán huánti taaktzankatayamánalh nac xlálatamatcán, xáhuachí acxtum nalalimakalh-chuhuiniyáhu laqüi akstítum nalatamayáhu uú nac cäquiltamacú, ¹⁷ laqüi chuná xlihuák huánti tatlahuaputún xtascújut Dios natakalhiy liskalala xáhua talacapastacni y chuná nacatziy lácu namakantaxtiy huántu lacuán tascújut.

4

¹ Nac xlacatín Dios xáhua nac xlacatín Cristo Jesús huánti namimparay cumu la chatum rey laqüi nacamákalhapaliy nacatatlahuay cuenta xlihuák huánti talamánalh xastacná chuná cumu la ti aya taninit, aquit clímapeksiyán ² pi ankalhiná caliakchuhuínanti xtachuhuín Dios, huix calichuhuínanti acxní cristianos takaxmatputún y asta mäsqui acxní xlacán ni takaxmatputún huix ankalhiná cacalimakalchuhuini. Cacamaakataksni huánti niq lihuana taakataksa, cacamauxcāni huánti tataxlajuanímánalh nac xtacanajlatcán, cacahuani lácu akstítum xlilatamatcán huánti talaktzankatayaputún nac xtacanajlatcán, y nęcxnicú cacalitlakuanti. ³ Porque lakcháma quilhtamacú acxní cristianos niaj catitakaxmatpútulh huántu xaxlicána xtalacapastacni Dios huata xmán huá nataputzay huantu atzinú talakatiy, hasta lluhua cristianos nataputzay xakchuhuínacán huánti nacaliakchuhuínaniy huántu xmán sacstucán takaxmatputún. ⁴ Xlihuak xatlán xtalacapastacni Dios natalakmakán huata huá natacanajlay cuentos huántu calichuhuínancán mäsqui caj

huāk xtalacapāstacnicán cristianos. 5 Pero huāntu huix milacata, acxní para túcuya tascújut natlahuaya lihuana calacapāstacti para chuná lakchán lā tlahuaputuna, y acxní lakchinán tapatín huix catayani y capati, pero chunatiyá akstítum caliakchuhuínanti xtachuhuín Cristo huāntu māstay laktáxtut, xāhuachí xmān huá calitaakatzanke lāta lihuana namākantaxtiya mintascújut huāntu lakayahuacanita.

6 Pero huāntu aquit quilacata, xtachunatiyá clitamakxteknit cumu lā aktum lilakachixcuhiún huāntu nalilakachixcuhiún Dios, chuná cuan porque aya talacatzuhuima quilhtamacú lāta naquimaklhticán quilatámat y nacniy. 7 Pero aquit juerza ctlahuaninít laqui nactayaniy nac quilatámat y nacmākantaxtikoy huāntu Dios quililacsacnít, luu xtachuná quitaxtuy cumu lā aktum takamán antanícu latlajacán, pero aya lakchanít quilhtamacú nacchán antanícu quilichánat xuanít, luu cāna cpaxuhuay pi nēcxnicú luu ctatlajinit y nītu claclatayama huata cmākantaxtinit huāntu Dios quimāquentajlinít. 8 Ahuatá chū cmakakalhima acxní Quimpuchinacán naquimaxquiyáchá nac akapún quincorona o taskáhu huāntu xlá mālacnunit nacamaxquiy xlihuāk huānti tamākantaxtiy xtachuhuín. Y nī caj xmān aquit caquintimáxquih huāntu mālacnunit, sinoque nā natamaklhtinán huāntu nacalimāskahuiún xlíhuāk amākolh huānti takālkalhimánalh acxní namimparay Quimpuchinacán porque tapaxquiy.

Pablo huan lāta lácu Dios maktayanit

9 Timoteo, luu xtlahua lanca litlán, aktum cacadzi juerza catlahuani laquí pála naquilaktana, **10** porque tamá Demas huantí caj xmán lakațiý lipaxúhu nalilatamay huantú uú xala caquiltamacú aktum cátzilh quiakxtekmákalh y alh putzay huantú lakațiý nac xacachiquín Tesalónica; quintalacán Crescente anít nac xapulataman Galicia, y Tito ná anít nac Dalmacia. **11** Caj xmán sacstu Lucas quintatamakxteknít. Catlahua litlán caputzapi quintalacán Marcos y acxtum catata porque xlicana pi lán naquylimacuaniy y naquimaktayay nac quintascújut. **12** Porque amá quintalacán Tíquico aquit cmalakachanít nac Efeso. **13** Xahuachí acxní natana natlahuaya litlán naquilitaniya capote huantú cakxtekuilinit cxacachiquín Troas nac xchic Carpo; ná natalitana quilibros, pero nitú tipatzankaya luu xlacasquinca nacalitana amatá lacstacaca xuhua antanícu ctzoknunít.

14 Xlicana pi luu lipecua quimakalipuhuanít tamá Alejandro huantí caliscuja cätlahuay pailas, porque lhuhua tu nitlán quintlahuaninit. Pero Quimpuchinacán namaxokoniy lata lácú mininiy napatiñán xpälacata huantú tlahanuit. **15** Huix luu skalalh calatapuli nitú tiakskahuiyán, porque luu lipecua lata quincasitziniyán y ni matlantiy huantú aquinín lichuhuinanáhu xtachuhuín Cristo.

16 Acxní huacu quintamacxtúcalh nac pulachin laquí naquintamakalhapaliy mapeksinanín nipara chatum tícu xquinkalhmaktáyalh. Xuá Dios pi ni xcalimapañinichán caj xpälacata huantú quintatlahuánilh. **17** Pero masqui nití

quinkalhmaktáyah solamente Quimpuchinacán quimaktáyah xlá quimáxquilh litlihueke laqui tlán nacliakchuhuinán amá lipaxúhu xtachuhuín Cristo huantú māstay laktáxtut, y xlihuák amākolh huanti ni talakapasa xtachuhuín Dios aquit ccāmakaxmátalh lata lacu xlá calakmáxtuputún xlihuák cristianos. Pero huá Dios quilakmáxtulh laqui ni naquintahuay tamākolh laclipecuánit lapánit, ¹⁸ y chunatiyá quimaktakalhma nahuán laqui tlán nacchán nac akapún y naquimáxquiy amá tapaxuhuán huantú xlá malacnuy. ¡Caj xman sacstu mininiy namáxquicán cácnit canecxnicahuá quilhtamacú! Chuná calalh, amén.

Pablo ahuatá caxakatlilacán canajlanín

¹⁹ Catlahua litlán lipaxúhu caquilaçakatlínicháhu y huantú quilacata cacāmacatiyapítit Prisca y Aquila, nachuná xlihuák huanti tahuilánalh nac xchic Onesíforo. ²⁰ Erasto antá tamakxtekchá nac Corinto, y Trófimo cumu xtatatlay antá cmakxtekchá nac Mileto. ²¹ Clacpuhuán pi pálaj tuncán xtat lihuán niä lakchán calonkni. Luu lipaxúhu taxakatlilacamachán Eubulo, Pudente, Lino, Claudia y xlihuák natalanín huanti uú xalanín.

²² Clacasquín pi Quimpuchinacán Jesucristo acxtum catalatamán.

**Xasasti talacaxlan
New Testament in Totonac, Coyutla (MX:toc:Totonac,
Coyutla)**

copyright © 2006 Wycliffe Bible Translators, Inc.

Language: Totonac, Coyutla

Translation by: Wycliffe Bible Translators, Inc.

Totonaco, Coyutla [toc], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Totonac, Coyutla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

88b96e23-f7a2-5cc8-864a-fdcd6f0686f4